

27/11/1999

Apabila ayam, musang, anjing hidup satu reban

Ahmad Zabidy Abdul Hadi

MESEJ manifesto Barisan Nasional (BN) bertemakan "Malaysia Bebas Sepadu Maju" adalah jelas dan padat. Perdana Menteri, Datuk Seri Dr Mahathir Mohamad secara terperinci menjelaskan makna setiap perkataan yang dipilih itu. Disebabkan ia begitu mudah, rakyat dari semua peringkat sama ada golongan berpendapatan rendah sekali pun, faham maksud manifesto BN. Setiap rakyat mempunyai kepentingan terhadap janji dalam manifesto itu.

Ia sungguh berbeza dengan perjuangan barisan alternatif, yang sebenarnya Barisan Perpecahan.

BN sejak dari awal lagi membawa corak perpaduan kaum sebagai teras. Dasar-dasar pemerintahan menjurus kepada semua aspek kenegaraan - politik, ekonomi, sosial dan dasar luar negara. Sebagaimana disebut dalam manifesto itu, semuanya praktikal, seimbang, sesuai dan bertepatan dengan iklim dan suasana domestik dan globalisasi.

Dalam manifesto itu juga Dr Mahathir dengan tegas menyatakan Malaysia tidak menganut ideologi tertentu sama ada fahaman kapitalisme, komunisme, sosialisme dan sebagainya. Ideologi berkenaan sudah tidak mampu mengurus dan mengekalkan kedaulatan sesebuah negara.

Mengenai pegangan ini, ternyata BN adalah satu pakatan dan kerjasama semua rakyat Malaysia yang berjaya mentafsir dan mengamalkan kebebasan dalam mencipta satu ideologinya sendiri. BN juga tidak menganut atau bertaklid serta tidak 'menelan' resepi asing secara 'pejam mata'.

Namun dalam mencipta satu ideologi yang bebas dan tidak statik, BN juga mencari permata bernilai di dalam teori-teori politik klasik Barat, Timur dan tamadun besar lain. Konsep ini memang wajar dan saintifik. Lagi pun, cara ini diajar Tuhan dan RasulNya dalam al-Quran: "Iaitu orang yang mendengarkan kata dan diturutinya mana yang paling baik. Itulah orang yang dipimpin Allah dan itulah orang yang berakal." (Q,39:18)

Tidak seperti ajaran sosialisme, komunisme dan liberal barat yang diamalkan oleh parti-parti pembangkang khasnya Pas, DAP, Parti Rakyat Malaysia (PRM) dan Parti Keadilan Nasional (Keadilan). BN mengiktiraf hak bangsa-bangsa yang ada tanpa sebarang perbezaan. Bahasa, adat resam, kebudayaan dan cara hidup dijaga dan dimuliakan.

Orang Melayu dalam 'rumah' Umno, orang Cina dalam 'rumah' MCA, orang India dalam 'rumah' MIC dan kaum lain dalam 'rumah' masing-masing. Rumah masing-masing dijaga dan dihias dengan begitu baik. Mereka hidup rukun damai, berjiran, bermasyarakat serta dapat berinteraksi secara teratur dalam prinsip undang-undang. Di sini BN adalah 'taman' bagi rumah-rumah mereka. BN amat memahami konsep ini. Ia juga meletakkan kerjasama antara kaum sebagai asas utama. Bukankah ini ajaran al-Quran dan Rasul?

Keutuhan cara kerjasama antara komponen BN tidak boleh dipertikaikan lagi. Lebih terserlah apabila dibandingkan dengan parti di luar BN. Contohnya Pas, yang mengamalkan assabiyah. Pas menganut teori kaum jumud Islam. Parti ini juga tidak mengiktiraf semangat nasionalisme Melayu dengan mengatakan semangat ini bercanggah dengan Islam.

Mereka berpendapat perjuangan sebetulnya ialah atas dasar Islam, bukan untuk kebaikan bangsa Melayu. Dengan itu mereka menolak sepenuhnya nasionalisme Melayu. Nampaknya hujah Pas amat lucu. Bolehkah ini wujud? Adakah Nabi Muhammad itu dilahirkan melalui kaumnya, bukan manusia atau malaikat? Rasulallah adalah bangsa Arab. Baginda menggerak dan memajukan bangsanya dengan ajaran Allah.

Menjadikan semangat nasionalisme sebagai halangan menampakkan

kesongsangan ajaran Pas. Tafsiran Islam dan al-Quran bagi Pas begitu daif dan beku. Hal berpakaian dan janggut pun mereka terperangkap dan tidak tahu membezakan hukum dan adat.

Bagi penyokong mereka, Pas bukan sekadar parti politik, malah satu agama baru. Mereka mencipta puak, mazhab dan agama Pas. Dalam Islam mengikut ajaran al-Quran, Tuhan itu Maha Esa dan musuhnya adalah kejahatan, dilambangkan syaitan. Agama Allah adalah Islam (tunduk dan patuh) bukan agama Pas. WahyuNya adalah al-Quran bukan kata-kata Mursyidul Am Pas, Datuk Nik Abdul Aziz Nik Mat. Perkara yang tidak betul adalah dari ajaran syaitan. Bila Nik Aziz berbohong dan mempersendakan agama dan al-Quran, bagaimana pula dengan pandangan kalangan pengikutnya?

Tidak aneh pengikutnya akan menunggu 'wahyu' Nik Aziz. Maklumlah ulama adalah pewaris Nabi. Mungkin bagi mereka ulama Pas adalah sama dengan Nabi.

Tidak jauh beza DAP dan PRM. Secara retorikanya, kedua-dua parti itu menganggap sejarah adalah sesuatu yang beku. Sangat malang bagi orang seperti Dr Syed Husin Ali yang sepatutnya faham sejarah. Kini aliran pemikiran mereka statik dan buta realiti. Mereka menganggap peristiwa sejarah lampau yang berpuluh tahun itu patut diperbetulkan. Bukankah itu untuk dijadikan teladan?

Perjuangan DAP dan PRM taklid kepada aliran sosialisme dan terikat kepada teori ahli falsafah Marxisme, Josef Stalin dan Mao Tse Tung. Sukarno dan Ho Chi Minh adalah idola mereka. Tidak pelik jika Rustam A Sani dan konco-konconya begitu asyik dan mudah menerima teori materialisme ini.

Arah konsep DAP dan PRM bolehlah disimpulkan sebagai sama. Cuma ramai tidak menganggotai DAP kerana parti ini majoritinya kroni Lim Kit Siang. Namun PRM menerima bangsa lain sebagai ahlinya. Kedua-dua parti ini kononnya antibarat, antiestablishment dan antikaum feudal, berpakaian macam Nik Aziz.

Antibarat, antiestablishment dan sebagainya adalah sekadar label. Ia mungkin sesuai dalam jangka masa tertentu saja. Ini disebabkan sifat 'anti'nya sendiri itu. Mungkin sempat bernafas di zaman prokemerdekaan, 1940-1950-an (itu pun sejarah membuktikan kegagalannya). Tetapi apa pun mungkin berlaku pada zaman ini. Dalam hal ini juga penentangan DAP dan PRM terhadap barat pun boleh dipersoalkan dalam banyak perkara.

Dalam banyak pendirian, kedua-dua parti ini jelas bersekongkol dengan pihak barat yang tidak bersetuju dengan kawalan mata wang dan mengecam BN. Mereka ini juga mendesak agar kerajaan membuka pasaran saham seluas-luasnya dan membiarkan penyangak masuk sekali lagi. Tidakkah ini menampakkan sokongan mereka secara terbuka kepada dasar Washington dan London. Jurucakap ekonomi mereka sendiri tidak pernah mengundi dalam pilihan raya. Apakah demokrasi sebenarnya?

Lewat musim ini muncul pula parti Keadilan. Parti ini muncul pada musim tengkujuh, ketika nelayan tidak ramai ke laut. Berbeza sedikit dengan Pas, DAP dan PRM, Keadilan diwujudkan tanpa sejarah. Berhala parti ini ialah Datuk Seri Anwar Ibrahim. Sebelum menyertai Umno, Anwar adalah Presiden Angkatan Belia Islam Malaysia (Abim) dan pejuang puak 'pengganas' bangsa. Orang PRM cuba sembunyikan sebaik mungkin kelemahan dan sifat semula jadi Anwar. Pengetahuan agama Anwar jelas tanpa asas yang baik.

Cuma sekadar sedikit petah bercakap Arab dan berpidato. Pengalaman politiknya langsung tanpa persediaan yang kuat. Jasanya tidak seberapa dibandingkan dengan tokoh lain. Beliau naik dalam parti dan kerajaan terlalu cepat. Bolehkah ini diterima dalam tugas ahli politik? Orang yang faham, akan faham masalah ini.

Dalam bab Anwar ini, ahli Umno patut peka dan kenal orang yang jujur daripada orang yang bertopengkan agama. Abim dan pertubuhan fanatik Anwar

tidak ada bezanya dengan al-Arqam. Mereka mempunyai arah dan patung tersendiri. Barisan alternatif adalah gabungan ideologi yang bankrap dan lapuk zaman. Dalam sejarah, kemunculan kapitalisme ditentang oleh komunisme dan sosialisme.

Sebelum itu muncul autokrasi dan feodalisme digantikan dengan kolonialisme. Dalam konteks sistem politik, cara apa pun memang mempunyai kelemahan dan kelebihan. Di sinilah kekuatan BN. Bebas dan tidak terikat. Dengan ini, barisan alternatif mengundang peperpecahan. Ia mengambil segala ideologi yang terbukti memusnahkan dunia ini secara total untuk diletakkan di negara yang tercinta ini.

Pas dengan tradisionalisme agamanya, DAP dan PRM dengan sosialisnya dan Keadilan dengan kronisme bersama sistem liberal barat dan imperialismenya. Di sini kita harus memahami dengan sebaiknya. Walaubagaimana banyak sekali pun ia berlabel agama, kesamarataan, Malaysian Malaysia dan dasar pasaran bebas, ia tidak mungkin dapat menjayakan negara seperti BN sekarang.

Mana-mana parti pembangkang mahu pun kerajaan yang tidak kenal antara topeng dan agama sebenar atau yang tidak boleh membezakan hak antara kaum yang sedia ada serta tidak bijak mengatur politik dan ekonomi secara sepadu memang akan gagal pada bila-bila masa pun. Inilah nasib Umno apabila manusia seperti Anwar bermaharajalela berbelas tahun di dalam parti dan kerajaan. Apabila beliau dilucutkan jawatannya, semua pihak menelan pahit racun ini.

Bak kata orang tua-tua memang ayam, musang dan anjing tidak akan hidup dalam satu reban. Saiz, makanan dan habitatnya jauh berbeza. Namun kita hanya mampu memeliharanya untuk tatapan dan pameran dalam zoo saja.

Tradisionalisme agama, sosialisme dan liberal barat tetap hancur dalam lipatan sejarah. Sekarang ini di negara kita merakamkan satu episod sejarah untuk generasi akan datang. Mangsa sejarah ini akan tercatat pada pilihan raya 29 November nanti.

PAS, DAP, PRM dan Keadilan akan bungkus `reban' masing-masing untuk dipindahkan ke zoo tidak lama lagi.

(END)